

आकाशवाणी

Morning Dogri (NSD) Bulletin 02-02-2026

खास-खास खबरां:-

- संसद च कल पेश कीते गेदे 2026-27 बरे दे केन्द्री बजट च विनिर्माण ते रोजगार दे मौकें पैदा करने पर मता ध्यान दिता गया- कुससंसारी यक्को-तक्की दे बावजूद भारत च विकास दी रफ्तार बरोबर बनाए रखने पर बी दिता गया जोरा।
- प्रधानमंत्री नरेन्द्र मोदी होरें बजट गी आम माहनू दे हितें पर केन्द्रित बजट करार दिंदे होई आखेया जे एह भारत दे आर्थिक विकास दी नींह गी मजबूती देने आहला बजट ऐ।
- संसद दे दौनें सदनें च अज्ज राष्ट्रपति हुंदे अभिभाषण पर धन्नवाद प्रस्ताव पर चर्चा शुरु होगा।
- राष्ट्रपति द्रौपदी मुरमू होर अज्जै थमां ओडिशा ते छत्तीसगढ़ दे 6एं दिनें दे दौरे पर जा रदियां न।
- 19एं बरे कोला हेठली उम्री दे आई.सी.सी. विश्व कप क्रिकेट च- भारत नै पाकिस्तान गी 58 रन्ज कन्नै रहाइयै सैमीफाईनल च प्रवेश कीता।
- ते एशियाई राईफल ते पिस्टल शूटिंग चैम्पियनशीप -2026 अज्जै थमां दिल्ली च शुरु होआ रदी ऐ।

<><><><><><>

PM -Budget

कल संसद च पेश कीते गेदे 2026-27 आहले बरे लेई केन्द्री बजट च विनिर्माण- ढांचागत विकास ते रोजगार दे मते शा मते मौकें पैदा करने दी जरूरतें पर जोर दिता गया ऐ। इस बजट च टैक्सों दी सखल्ली प्रक्रिया ते सीमा शुल्क बवस्था दी बी पेशकश कीती गेदी ऐ। अपने

उपरोतली 9में बजट च केन्द्री खजाना मंत्री निर्मला सीतारमण होरें कुल संसारी सतह पर बनी दी यक्को-तक्की आहली स्थिति दे बावजूद भारत च विकास दी रफतार गी बनाई रखने लेई बुह-आयामी रणनीति पेश कीती ऐ- जेहदे च घरेलू इलैक्ट्रॉनिक्स ते सेमीकंडक्टर छमताएं दा विस्तार- ढांचागत विकास सरबंधि खतरें गी घट्ट करने- उभरदियें प्रोद्योगिकियें लेई देसै दे नौजवानें गी हुनर प्रदान करने ते करदाताएं ते आयातकें लेई नियमें दी पालमा गी सखल्ला बनाने पर जोर दिता गया ऐ। सरकारी खजाने दा अनुशासन बनाई रखदे होई सीतारमण होरें आखेया जे 2026-27 च राजकोषी खसारा सकल घरेलू उत्पाद दा 4 इशारिया 3 प्रतिशत रौहग- जेहड़ा चालू माली बरे लेई अनुमानित 4 इशारिया 4 प्रतिशत कोला घट्ट ऐ। सुधार सरबंधि फंड आसेया समर्थन हासल शैहर आर्थिक क्षेत्रें दे राएं दुई ते त्रीऽ सतह दे शैहरें गी शैहरी विकास दे केन्द्र च रखेया गेदा ऐ। बजट च आर्टिफीशल इंटेलीजेंस ए.आई. गी इक स्वतंत्र विशे दे बजाए अंतर क्षेत्रीय शक्ति दे रुपै च कायम कीता गया ऐ ते बजट नै शासन-कृषि- शिक्षा- हुनर विकास जनेए क्षेत्रें च बी ए.आई दे पूरा-पूरा इस्तंमाल गी बढ़ावा देने पर जोर दिता ऐ।

<><><><><><>

PM -Budget

प्रधानमंत्री नरेन्द्र मोदी होरें आखेया ऐ जे केन्द्रीय बजट मानव केन्द्रित ऐ- ते अभूतपूर्व सुधारें कन्नै भारत दी नीह गी मजबूत करदा ऐ। प्रधानमंत्री होरें इसी ऐतिहासिक करार दिंदे होई देशे दे सुधार पथ ते दीर्घकालिक विकास गी गति देने आहला उत्प्रेरक आखेया। खजाना मंत्री निर्मला सीतारमण होरें जंदे रोज संसद च माली बरे 2026-27 आहला आम बजट पेश कीता हा। बजट पेश होने दे बाद अपन संबोधन च मोदी होरें आखेया जे बजट प्रस्ताव अर्थबवस्था गी ऊर्जा प्रदान करगंन। नागरिकें गी सशक्त बनांगन ते भारत दे युवाएं गी नमीं ऊंचाइयें गी छूने दे नमें मौके देगंन। सरकार दे सुधार एजेंडे गी “सुधार एक्सप्रेस” गलांदे होई प्रधानमंत्री होरें आखेया जे भारत जिस “सुधार एक्सप्रेस” पर सवार ऐ- उसी इस बजट कन्नै नमीं ऊर्जा ते गति मिलोग।

<><><><><><>

Parliament -Motion of Thanks

संसद दे दौनें सदनें च अज्ज राष्ट्रपति हुंदे अभिभाषण पर धन्यवाद प्रस्ताव पर चर्चा होगी। केन्द्रीय मंत्री सर्वानंद सोनोवाल लोकसभा च एह प्रस्ताव पेश करंगं- जिसलै के भाजपा सदस्य तेजस्वी सूर्या एहदा समर्थन करंगं। राज्यसभा च भाजपा दे गै सदानंदन मास्टर एह प्रस्ताव पेश करंगं ते उंदी गै पार्टी दीयां सदस्य मेधा विश्राम कुलकर्णी एहदा समर्थन करंगं।

<><><><><><>

Israel –Rafa

इजरायल नै गाजा ते मिस्र दे मझाटै स्थित राफा आली बन्ना चौकी गी अहे-दुब्बे तौरा पर परतियै खोलने दी घोषणा कीती ऐ चौकी पर कब्जा कीते जाने दे बाद इस चाल्ली दी एह पैहली-पैहली कारवाई ऐ। मकामी मीडिया दिये रिपोर्टे मुजब इजरायल दे अधिकारिये दा हवाला दिंदे होई गाजा दे बसनीके दी आओ-जाई लेई इस चौकी गी अजमैश दे तौरा पर खोलया गया ऐ।

<><><><><><>

Prez Visit

राष्ट्रपति द्रौपदी मुरमू होर अज्जै थमां ओडिशा ते छत्तीसगढ़ दे 6एं दिनें दे दौरे पर जा रदियां न। इस दौरान ओ बालासोर च फकीर मोहन युनिवर्सिटी दे दीक्षांत समारोह च शामिल होगं ते एहदे नमें बनाए गेदे ऑडीटोरियम दा उदघाटन बी करंगं। 4 फरवरी गी राष्ट्रपति होर रायरंगपुर दे महलडीहा स्थित कुड़िये दे सरकारी हायर सकेन्द्री स्कूल च भंजवीर सुनाराम सोरेन हुंदी मूर्ति परा पड़दा गोआडगंन ते बच्चिये कन्नै गल्लबात बी करंगं। राष्ट्रपति हुंदा सरकारी आयुर्वेदिक मैडिकल कालेज ते अस्पताल- ओडिशा एग्रीकल्चर ते

टैक्रॉलोजी युनिवर्सिटी- तीरंदाजी केन्द्र ते शैहरा दे पानी दी निकासी सरबंधी बक्ख-बक्ख परियोजनाएं दा उदघाटन जां नीह पत्थर रखने दा बी कार्जक्रम ऐ। इस महीने दी 6 तरीक गी राष्ट्रपति मुरमू होर सिमलीपाल च आदिवासी महिलायें ते नौजवानें कन्नै गल्लबात करगंन। एहदे इलावा ओ भुवनेश्वर च ग्लोबल फाइनेंस एंड टैक्रोलजी नैवटर्क दे सहयोग कन्नै ओडिशा सरकार आसेया आयोजित ब्लैक स्वैन शिखर सम्मेलन च बी हिस्सा लैगंन। 7 फरवरी गी उन्दा छत्तीसगढ़ दे जगदलपुर च बस्तर पांडुम 2026 महोत्सव दा उदघाटन करने दा बी कार्यक्रम ऐ।

<><><><><><>

Peter Mandelson Resign

बरतानिया दे साबका मंत्री लॉर्ड पीटर मॅडलसन होरें सत्तारुढ लेबर पार्टी थमां इस्तीफा देई दिता ऐ। एह इस्तीफा पूरे होई चुके दे फाइनान्सर ते योन अपराध दे दोषी जेफरी एपस्टीकन कन्नै उन्दे सरबंधें दियें खबरें दे बाद आया ऐ। एपस्टीन कन्नै अपने पराने सरबंधें कारण पिच्छले बरे अमरीका दे राजदूत दे ओहदे सवा बरखास्त कीते गेदे मॅडेलसन हुंदा ना जंदे शुक्रवारें अमरीका दे न्याय विभाग आसेया जारी फाइलें च सामने आया हा। इनें दस्तावेजें थमां पता लगा हा- जे एपस्टीन नै 2003 ते 2004 च त्रै बक्ख-बक्ख लैनदेन च लॉर्ड मडेलसन गी 75 ज्हार डॉलरें दा भुगतान कीता हा।

<><><><><><>

Iran-US Warming

ईरान दे सर्वोच्च नेता अली खामेनेई होरें अमरीका गी चेतावनी दिती ऐ जे अगर उंदे देश पर कुसै बी चाल्ली दा हमला कीता गया ते एहदा नतीजा क्षेत्रीय युद्ध दी शकल च होग। एह ब्यान ऐसे मौके पर आया ऐ- जिसलै अमरीका दे राष्ट्रपति डोनाल्ड ट्रम्प पच्छमी एशिया च अपनी फौजी ताकत गी बदा रदे ना। इस बड्डे किट्टु गी सम्बोधित करदे होई खामेनेई होरें आखेया जे अमरीका- ईरान दे कन्नो-कन्नो ओहदे विशाल तेल ते प्राकृतिक गैस संसाधनं गी

हड़पना चाहंदा ऐ। उनें एह बी आखेया जे हाल च गै सरकार विरोधी-प्रदर्शनें दौरान जेहड़ियां घटनां होइयां- ओह तख्तापलटने दे बरोबर हियां। उनें इस हिंसक अशांति गी “राजद्रोह” करार दिता। तोंआई अमरीका दे राष्ट्रपति ट्रम्प होरें मेद बुज्जी ऐ जे ईरान कुसै समझौते आस्तै सहमत होई जाग।

<><><><><><>

U-19 Cricket India-Pakistan

19एं बरे कोला हेठली उम्री दे आई.सी.सी.विश्व कप क्रिकेट च कल भारत नै जिम्बाब्वे दे बुलावेयो स्थित क्वींस स्पोर्ट्स क्लब च खेड्डे गेदे मैच च पाकिस्तान गी 58 रन्ज कन्नै रहाँई दिता। 253 रन्ज दे लक्ष दा पिच्छा करदे होई पाकिस्तान दी पूरी टीम 46 ओवर ते 2 गेदें च 194 रन्ज गै बनाई सकी। भारत लेई आयुष म्हात्रे ते खिलन पटेल नै पाकिस्तान दे 3-3 खडारी आउट कीते- जिसलै के आर.एस. अंबरीश-हेनिल पटेल- कनिष्क चौहान ते विहान मल्होत्रा नै इक-इक विकट लैता। कनिष्क चौहान गी मैच दा बेहतरीन खडारी घोषत कीता गया। इस जित्त दे कन्नै गै भारत सैमीफाईनल च पुज्जी गया ऐ ते ओहदा अगला मैच अतरु बुधवारे अफगानिस्तान कन्नै होगा। कल आस्ट्रेलिया ते इंग्लैंड बश्कार सैमीफाईनल खेडेया जाहगा। फाइल मैच 6 फरवरी गी होगा।

<><><><><><>

Shooting -Championship

नशानेबाजी दी एशियाई राइफल ते पिस्टल शूटिंग चैम्पियनशीप-2026 अज्जै थमां नमीं दिल्ली दे डाक्टर करणी सिंह शूटिंग रेंज च शुरु होआ रदी ऐ। दंऊ हफ्तें तोड़ी चलने आहली इस प्रतियोगिता च एशिया दे केंई नामवर नशानेबाज हिस्सा लैगंन ते एहदे मते दिलचस्प रौहने दी मेद ऐ। एह मकाबले मर्दे ते महिलायें दे जूनियर ते युवा वर्गे च होगंन- जेहडे 10 मीटर- 25 मीटर ते 50 मीटर राइफल ते पिस्टल मकाबले च उतरगंन। इनें मुकाबले च बी

बकख-बकख श्रेणियां होगंन- जिंदे च व्यक्तिगत टीम ते मिक्सड वर्ग शामिल ना। प्रतियोगिता च एशिया दे 17एं मुल्ले थमां खडारी हिस्सा लै करदे ना।

<><><><><><>